



25. september 2023

UKA2023/15b

Naalakkersuisut siulittaasuata ammaanermi oqalugiaataa tunngavigalugu oqallinneq.

(Naalakkersuisut siulittaasuat)

Aallarniutigalugu Naalakkersuisut siulittaasuata ammaalluni oqalugiaataanut imartuumut Siumumiik qujavugut.

Kingumunaasit ukiaanerani ataatsimiissalluta maanga Inatsisartut ataatsimiittarfissuanut katersuupugut, aasap ulluini ilaquqtat, ikinnigutit minnerunngitsumillu pinngortitaq nukissamik qularnanngitsumik aallerfigereerlugit.

Siumup Inatsisartuutaani erinisuppugut Inatsisartuni, Naalakkersuisuni maanilu allaffissuarmi suleqatigut, ukiaq manna ulapaaqatigissallugit minnerunngitsumik nunatsinni innuttaasunut atugassarititaasut sabinngisamik pitsanggorsassallugit nunattalu siumut ingerlaqqinnissaanut aqqutissiueqatigiissalluta. Pingarnerpaatitsigu qinikkatut nunarput inuili pillugit qinigaanikuugatta, nunatsinnut nunaqqatitsinnullu kiffartuussisussaatitaalluta.

Tamatta inissaqarpugut

Maani nunami innuttaasut: nunatta avannaarsuaninngaanneerutta, kitaaninngaanneerutta kangianinngaanneeruttaluuunniit inuiaavugut ataatsit. Tamatta tikilluaqquaasariaqarpugut suminngaanneerneq apeqqutaatinnagu nunatsinnimi innuttaasut tamaasa pisariaqartippagut. Taamatulli oqarneq naammassorinanngilaq tassami tamatta maani nunami angerlarsimaffeqarnissarput kialaartumilu siniffeqarnissarput ulloq manna tikillugu qulakkeersimanngilarput. Takorluulaariartigu nunatta avataaniik suliartortorpassuit

tikerarput inissaqartinneqartarlutillu. Sooq taava nammineq nunaqqatigut inissaqartissanngilagut? Nunarput issittuuvoq inuillu ikittunnguuvugut, ajornartorsiut kivissinnaasariaqarparput kommunit suleqatigalugit.

Nuttarsinnaanermut aningaasaateqarfiup atorluarneqarsinnaanera anguniarlugu, piumasaqaatit nutarterneqaqqissinnaanerat Siumumi ammaffigivarput, inummi suliffissaqaruni inissaqarlunilu taava periarfissaq taanna atorsinnaasariaqarpaa suliffissaaleqisuuneq tunngaviginngikkaluarlugu.

Pinngortitamut eriaginninneq

Pinngortitamut mingutsitsinnginnissaq sulissutigiuartariaqarparput ass. erngup nukinganik nukissiuuteqarnikkut annertusaaqqinnissamik pilersaarutit aammali inuttut ataasiakkaatut iliuuseqaqataanerusinnaavugut, ass. tamatta immitsinnut qiviarsinnaavugut, qanoq atueriaaseqarpugut? Qanoq iliorutta pinngortitaq mianerinerusinnaavarput? Inuttut ataasiakkaatut, nerisassanik eqqaanerujussuaq iliuuseqarfingisinnaavarput sinnitsinnik atorluaaneq tunngavigalugu, atisakugut inunnut allanut ingerlateqqissinnaavagut uagullu allat pigisakuunik atorluaaqqissinnaalluta aammali pisiniarfinni suliffeqarfinnilu allani nerisassanik eqqaaneq pinngitsoortinniarlugu iliuuseqarnerusinnaavugut soorlu nerisassanik qaangiutilersunik akikilliliisarnikkut, tassami CO₂-mik mingutsitsineq annikillisassagutsigu tamatta iliuuseqaqataasariaqarpugut inuttut ataasiakkaajugutta imal. suliffeqarfimmikiutta.

Suliffeqarfiiit pisortat pigisaat aammalu namminersortut akunnittarfiillu il. il. mingutsitsinerat isiginiarnerusariaqarpagut iliuuseqarfagalugillu assersuutigiinnartigit mingutsitsinnginnerusunik akuutissanik svanemærkilinnik atuinerat qanoq ippat? Aammattaaq microplast silaannarmik imartatsinnilu mingutsitsisoq annikillisarniarlugu suliffeqarfiiit qanoq iliuuseqarpat? Siumumi isumaqarpugut atorluaanermut pikkorissiartoraluarluta suli tamatta annertunerusumik iliuuseqaqataanerusariaqartugut.

Utoqqaat

Oqartoqartarpoq utoqqaat qimarrapput aammalu utoqqaat asuli qineqquaarutaannaasut, taamatut oqartarneq misigisimanerlu paasinarpooq tassami politikkikkut iliuuserisagut

tuaviuunneqarsimallutik suliarineqarsimasut ilaanni artukkersuutaaginnalertartut ilisimavarput.

Politikkikkut iliuuseqartoqarpoq, aapparisap isertitai nanertuutaajunnaarniarlugit aammalu annerusumik isertitaqarsinnaaneq aqqutissiuunneqarluni kisianni utoqqlinersiat suli naammanngerujussuarput. Naammaginartumik aaqqiinissatsinnut akissaqanngikkutta, nunatta karsia miinusertinnaveersaartariaqanngilarput imal. nunatta avataanut aningaasanik atorniarsinnaavugut, Siumumiik aqqutissat taakkua tikkuarpagut pisariaqavimmat aaqqiissuteqarnissaq.

Sulisussaqarniarneq

Qaffasissumik ilinniarsimasunik soorlu nakorsanik, niviarsissanik, uumasut nakorsaannik, inatsisilerituunik allanillu pisariaqartitsinerput suli annertuvoq taakkualu tikisiortorneqarnerat pissusissamisoorpoq. Allanittaaq avataaniik tikerartoqarpoq, soorlu kangiamiunik taakkua igaarisartagaat soqtigineqartorujussuummata aammali nunaqavissut suliffigisinnaasaralui allaat maanna tikisitanik suliarineqartalerput soorlu pølsebarini, asaasuni, pisiniarfinni allanilu sulisussatut tikerartinneqalermta tunngavilersuutigalugu "kalaallit sulisinnaanngimmata". Taamaattumik tikisitsinissamut piumasaqaatit sukaterneqartariaqalerput kalaaleq nunaqavisoq salliutinneqartuarnissaa siunertaralugu.

Nunaqqatigut timikkut ajoquteqanngikkaluarlutik sulisinnaagaluit sulisinissamilli kajumigisaqanngitsut aningaanik annerusumik piumasaqaateqanngitsumillu pisortat tungaanniik tuniorartarpagut, allaat aningaasat taakkua aanngajaarniutinut atorneqarnerat isiginnaaginnarlugu, alloriartariaqalinnginnerpugut aningaasat tunniussatta aanngajaarniutinut atorneqannginnissaat qulakkiissallugu?

Ullumikkut uunga killissimavugut, sulisussaaleqineq tunngavigalugu suliffeqarfiiit matoqqasariaqartarlutik imal. sivikinnerusumik ammasariaqartarlutik ass. sulisut aningaasarsisimammata aammalu inuusuttorpassuit ilai uninngaannarmata sulerusunnatillu.

Peqqinnissaqarfik, inunniq isumaginninneq, sillimaniarneq

Peqqinnissaqarfik pillugu innuttaasut maalaarutaat tusartuarpagut, tamannalu tupinnanngitsumik pissutissaqarluarpoq tassami avatitsinnut sanilliulluta nunatsinni atugassarititaasut allarujussuupput. Nakorsat niviarsissallu amigartorujussuupput atugassarititaasallu taakkununnga pitsaanerpaanatik. Inuit ataasiakkaarluta immikkut nakorsaqanngilagut akerlianilli nakorsat niviarsissallu allanngorartorujussuit nunatsinni sulipput, taamaattumik Siumumi isumaqarpugut piffissangortoq nunani allaneersunik nakorsanik atuinissaq aqqutissiuutissallugu, ass. ippassaaneeraannannguaq Inatsisartut Nunanut allanut sillimaniarnermullu ataatsimiititaliaat USA-mi angalagami amerikarmiut nakorsaannik qaffasissumillu inisisimasumik ataatsimeeqateqarpoq. Nakorsaq taanna oqaluttuarpoq, Qaanaamiissimalluni taavaniinnerminilu aggersarneqarsimavoq ikiuukkiartoqqullugu, sunaaffa arnaq inuuusuttunnguaq ernisuttoq. Piumaffiginineqarnini malillugu ikiuussimavoq, aamma tuluttut oqaaseqarnera aporfiusimanngilaq pisariaqartitsisorlu ajornaqteqanngitsumik ernisinneqarsimalluni. Oqaatigaa nunatsinni innuttaasut amerligaluttuinnartut tuluit oqaasiinik atuisinnaammata oqaatsit attaveqatigiinnermi ajornartorsiutaanngitsut aamma oqaluttuarpoq Amerikami nakorsat 100.000-usut taakkunanngaanniillu ass. nakorsat imal. nakorsangorniat nakorsanngorlaallu 100-t nunatsinnut nassiunneqarsinnaagaluartut piffissami sivisunerusumi sulisillugit allaallu immaqa akikinnerusumik sulitinneqarsinnaallutik soorlu sinerissamut siamarlugit, akisoorsuarminngooq tikisitsisarnerput taamaalilluni killilerneqarsinnaammat namminnerlu nunaminnut ataqqinnittuugamik Amerikami innuttaassusertik peernaviangilaat. Sooq soqutiginnippat? Tassa nunatsinni sulisinnaaneq soqutigivaat, Amerikami allaffisornerujussuaq pissutigalugu, Amerikarmiut nakorsarneqassagunik sillimmateqaqqaartariaqartarmata tamannalu nakorsanut allaffisornerujussuarmik kinguneqartarmat tamannalu Amerikami napparsimavimmi sulinissamut kajumissaataaneq ajormat. Nakorsaq taanna naapitarput, nunatsinni Peqqinnissaqarfiup qullersaqarfianut allagaqartarsimagaluarpoq ajoraluwartumillu ulloq manna tikillugu akineqanngisaannarsimalluni.

Ajornartorsiut alla taarusutarpot tassaavoq, nunatsinni sulisoqarsinnaanermut akuersissutit naalagaaffimmiit aqunneqarnerat, tamanna ukiorpassuanngortuni killilersuisuovoq suliat sukkanerusumik suliarineqarsinnaagaluartut Qallunaat Nunaanni arriisaarunneqartarmata.

Tassunga oqartussaaffik nunatta akisussaaffigilertariaqaraa Siumumiik aammaarluta oqaatigerusupparput.

Ajornartorsiut alla isiginngitsuusaarsinnaanngisarput tassaavoq takornariarpasuit nunatsinnut isaalerneranni peqqinnissaqarfitta ilungersoreersup qaavatigut artukkerneqarneq. Tamanna Islandimi aamma nalaanneqarsimavoq ullumikkullu suli ajornartorsiutaalluni, taamaattumik umiarsuit takornariartaatit nunatsinnut qanoq iluaqutaatiginersut misissorneqartariaqarpoq, eqqaamavarami Avannaata Kommunia ataatsimeeqatigalugu oqartoqartoq umiarsuit takornariartaatit taamannak tikeraraluarmata illoqarfiup aningaasarsiorneranut annerusumik sunniuteqarneq ajortut, akerlianik umiarsuit inuillu pinngortitamut annertuumik mingutsitsisarput peqqinnissaqarfimmullu artukkiisarlutik. Ajornerpaamik pisoqarmat ippassaaninnguaq tunumi kangerluit ilaanni umiarsuaq ikkarlippoq qujanartumilli inunnik ajoqusertoqarani. Taamaattumik minnerpaamik umiarsuit takornariartaatit nunaqavissunik ilisimasortanik ilaqtinnejartariaqarput, immami nalunaarsorneqarsimanngitsuni angalaqqusaassanngillat, piniartut akornusersorneqassanngillat aamma kulturitsinnik ilisimasalinnik soorlu qangarnisarsiuunik nunami angalaassappata ilaqtinnejartarnissaat piumasaqaataasariaqarpoq ass. tunup kangerluani imal. sineriatta ilaani tassami eriagisassanik ulikkaarpoq ilivitoqqanik aammalu siulitta atortorisimasaannik, ujaqqanik erlinnartunik allarpassuarnillu. Naatsumik oqaatigalugu nakkutilliineq iluarsineqartariaqavippoq takornariartaatinuunnaanngitsoq kisianni aamma tingerlaatilinnut nunatsinnut tikeraannavissunut.

Oqariartutigiuarparput, imartatsinni sinerissamilu nakkutilliineq nunaqavissunik inuttaqartitsinikkut soorlu Coast Guard-inik pilersitsinikkut nakkutigineqartariaqartoq siunnersuut taanna nammineerluta qaqittareernikuugatsigu matumuuna Naalakkersuisunut kaammattuutingeqipparput.

Imminut toqutarneq kinguaassiuutitigullu atornerluineq ajornarsiutitta annertunerpaat ilagaat, tassunga killittarneq amerlanerpaatigut pisarpoq aanngajaarniutnik soorlu imigassamik ikiaroornartumilli atuisimanikkut. Imminut toqutarneq eqqarsaatigalugu amerlanerpaat ilisimatitseqqaaratik ikiortissarsioqqaaratillu imminut toqutarput. Inuit tassunga killittartut neriuuteqalersissinnaasariaqarpagut sunami tamarmi

taartuinnaanngilaq, inuuneq tunissutaammat erlinnarnerpaaq tamatta ammaffiginerusariaqarparput inoqammut ikiuisinnaaneq. Kinguaassiuutitigut atornerluinerup kinguneranik inuppassuit inuunerat aserorneqartarpooq, taakkununngali pinerliisimasut sakkukinnerpaamik pineqaatissinneqartarlutik, tamanna akuersarneqarsinnaanngilaq pineqaatisseeriaaserlu piaernerpaamik sakkortusineqartariaqartoq isumaqarpugut.

Nunatsinni innuttaasut taama ikitsgaluta, meeqqanik angerlarsimaffiup avataanut millionerpassuit atorlugit inissiisarneq taamaattussaannartut ajoraluartumik isingineqalersimavoq tassa sumiginnaaneq annertooq tunngavia mangiarneqartariaqarluinnarpoq.

Soorlu oqaatigereerippuit, inuunerluutitta annertuut ilagivaat ikiaroornartoq minnerungitsumillu imigassaq, allaammi aanngajaarniutit sakkortunerujussuit atugaalerataltuinnartut politiit ukiumoortumik nalunaarutaanni takuneqarsinnaavoq, taamaattumik katsorsaasut atorluartariaqarpagut apeqqutaatinngagu Minnesota Behandlingimik ilinniarsimasuunersut, alternativ behandlingimik ilinniarsimasuunersut allatulluunniit katsorsaasutut ilinniarsimasuunersut tassami tamaasa pisariaqartippagut. Tamaataattumik Siumup Inatsisartuutaasa naalakkersuisut kaammattorusuppaat katsorsaasunik siammasissumik atuinissaq qulakteerneqassasoq.

Perorsaasut tusagassiortullu

Ukiut tamaasa Inatsisartuni ataatsimiikkaangatta perorsaasunik amigaateqarnerujussuaq eqqartortarparput annerusumilli aaqqiissuteqarsimannnginnatta ajornartorsiut suli qaanginngilarput.

Nuna manna inuit tamat oqartussaaqataanerannik tunngaveqarpoq pissaanerillu pingasut ingerlatsinermi tunngaviupput. Pissaanerit pingasut akornanniippoq tusagassiutit, tusagassiuiteqarneq tusiappat inuiaqatigiittut aamma tusialissaagut. Taamaattumik tusagassiortussaaleqinermik ajornartorsiut iliuuseqarfingeqartariaqarmat Siumumiik suleqataarusuprugut.

Oqartoqartaraluarpoq kattuffiit isumaqtiginninnialerpata tamakku isumaqtiginninniutissaasut angusalli pitsanngoriaammik malitseqartaraluartut ajornartorsiutit ima angitigipput killiffik isiginngitsuusaaginnarneqarsinnaanani inuaqatigiinnut annertuumik eqquimmata. Assersuutigisigu ippassaaninnguaq qallunaat naalagaaffiata ilinniakkat assigiinngitsut pingasut malunnaatilimmik aningaasarsiatigut immikkut iliuuseqarlutik qaffaaffigaat, taakkua inunnut sullissinermi toqqaannartumik attuumassuteqarmata, taamatut iliuuseqarneq matumuuna uanguttaaq naalakkersuisunut eqqarsaatissiissutitut ingerlateqqikkusupparput.

Atuartitaaneq ilinniartitaanerlu

Meerartagut taamatta siunissamik qaamasumik kissaattarpagut, atualeraangata persuarsiortarpugut meerartagulli oqaatsnik allanik piginnaasakikkaangata innarluuteqarlutilluunniit taava ingerlariaqqinnissaat aporfissalerneqartarpoq.

Taamaattumik inuusuttorpassuit ullumikkut ajoraluartumik unittooqqapput periarfissaqartitaanatillu.

Uani qinigaaffimmi ilinniartitaanermut naalakkersuisoq oqarpoq, ilinniarnarluni oqaatsit aporfijunnaassasut ullumikkulli suli taanna anguneqanngilaq, una aasaq angajoqqaamit saaffigineqarpunga qitornaa GUX Nuummi tiguneqarsimagaluartoq kinguninngua saaffiginnittoqaqqissimavoq qallunaatut piginnaasai amigarmata tiguneqarneringalua atorunnaarsinneqartoq. Eqqarsarnarpoq nuna manna kalaallisut oqaluffiusoq qallunaat oqaasii pingartinneqarnerummata, nunatsinnimi innuttaasut kalaallisut oqalussinnaanngitsut ajornaquteqanngitsumik GUX-imi ilinnialertarput soorlu qallunaatut oqaasillit imal. nunani allaniit nunatsinnut nunasisut. Taava sooq nunaqavissoq allanit ajornerusumik inissinneqassua? Ila tamakkua illersugaalertariaqarput! Sooq nunatsinni ilinniarfiit qaffasinersaat Ilisimatusarfik / Universitet kalaallisut oqaatsit ammaassimappagit ilinniarfiit allat taama ajornasaartigissappat? Kalaaleruna nunamini najugalik illersugaasussaasoq isiginnaartuuinnarani. Taamaattumik neriorsuut tamanna piaernerpaamik piviusunngortinneqassasoq Siumumiik Ilinniartitaanermut naalakkersuisumut piumasarissavarput, qulakkeerneqartariaqarmat inuusuttatta pinngitsooratik ingerlariaqqiffeqarnissaat siunissami inuussutissarsiorlutik uppernarsaatigisinnaasaannik.

Sunali tamarmi taartuinnaanngilaq, ilinniarlutik naammassisartut qujanartuik amerliartuinnarput taamaakkaluartoq naammassisut tamaasa ullumikkut atorfinitssissinnaaneq ajorpagut naak oqaasinnaaringaluarlugu "Ilinniarniaritsi ilinniarniaritsi" taamatut piumasaqarutta, minnerpaamik kalaaleqatigut ilinniarsimasut atortariaqarpagut taamaanngippammi ullumikkut innuttaasut 400 miss. nunatsinniik aallarartartut ikiliartornavianngillat. Immaqa atorfinitssitseriaaseq allaanerusoq eqquttariaqarpaput ass. atorfinitssisarneq killilimmik qaqugorsuarmuunngitsoq ass. killilerlugit ukiut tallimat taava ukiut taakkua nallerpata naliliisoqaqqissaq atorfilik ingerlaqqissanersoq imal. kalaallimik taarserneqarsinnaanersoq? Imal. nuna manna inatsisitigut pisussaaffeqartariaqarpoq pinngitsoorani kalaaleq ilinniarsimasoq qinnuteqarpat atorfinitssissallugu. Atorfinitssisarneq eqqartortillugu Namminersorlutik Oqartussani atorfinitssisartut aamma qiviarneqartariaqarpaput, tassani issiasut kikkuugaluarnersut minnerpaamik arnat angutillu naliqimmik issiasariaqarpaput aamma tamarmik kalaaliusariaqarpaput tamannami allanngortinngikkutsigu taava ukiorpassuit suli tessaneerusaarnissarput qularnanngilaq.

Pituffik

Eqqaallatsiarpara ippasaaninnguaq Inatsisartut Nunanut allanut sillimaniarnermullu ataatsimiitaliaat Amerikamiissimasoq. Angalanerup ilaani Capitol Hill-im tassa inatsisartoqarfimmi Senatorit issittumik soqutigisallit naapikkatsigit apeqqtigisaat unaavoq, nunatsinni Pituffik Space Base-mik atuinerminnut qanoq annertutigisumik nunatut akiliisarnerlutik. Soorunami unneqqrissumik akineqarput, nunatsinnut toqqaannaq akiliuteqarneq ajortut taamaallaalli sulisuisa akileraarutaat nunatta karsianut tuttartut, allaallu Pituffimmi pisiassaataat Amerikamiik tikisinneqartartut naak nunatsinniik pilersorneqarsinnaagaluarlutik aamma suliffeqarfik kiffartuussinissamut isumaqatigiissuteqarfiusoq qallunaat suliffeqarfutigingaat. Soorunami eqqarsariaallappasipput, taamaattumik alloriaqqittariaqarpugut blok tilskudinik taaneqartartut qaqugorsuarmut kannguginagit taamaattussaannartullu isigalugit isumallutigisinnaanngilagut uffa taarsersugassagut taava taartissaannik nassaarniarluta ilungersuuteqarniarta taakkua Naalagaaffinngornissatsinnut aporfiusimappata.

Naalagaaffinngornissaq

Nunat nunasiaataasimasut FN inatsisai malillugit Free Association tunngavigalugu naalagaaffinngorsinnaapput, FN malittarisassaani allaqqavoq nunasiaateqarsimasup nunasiaatigisami naalagaaffinngornissaq kissaatigippagu ikuuttussaasut aporfilersuinatik. Ilaa 1953-mili periarfissaq tamanna uatsinnut unneqqarissumik periarfissatut Naalagaaffimmik tikkuunneqarsimasuuppat ullumikkut sumummita killissimassagaluarpuq? Nammeneq nunanut allanut isumaqatiginniniarsinnaalluta, avaqqutaarneqarata salloqittaarineqaratalu. Ullumikkummi avaqqutaarneqartarnerput naliginnaasuusoq naammalerpoq, nunarput sapinngilaq nammineersinnaavoq. Immitsinnut sapertutut inissittuaannassagutta taava qaqugorsuarmut taamatut inisseqqanissaq qularnanngeqaaq. Partiit ilai oqalupput ajornartorsiuterpassuaqaratta susinnaanngitsugut, suna nuna naalagaaffik ajornartorsiuteqanngitsoq ilisimavarput? Nunarput naalagaaffinngorsinnaavoq nunanik allamik isumaqatigiissuteqarluni ila periarfissat amerlangaluaqaat.

Tunngaviusumik inatsisissaq aqqutissat ilagiinnarpaat inatsisartut aaliangiiffiginikuusaat, taanna suliaq ilaasa unitsivinniarsaraat aningaasarpassuarnik atuiffioreermaat taava allatuulli suliarujussuaq aningaasarpassuarnik nalilik eqqaavimmut ingiinnassuarput? Taamaaliortoqassappat inuiaqatigiinnut mitallernerussaaq akuersaarneqarsinnaanngitsoq. Suliaq annertooq naammassineqartariaqarmat Siumumiik siunnersuuteqarpugut innuttaasut peqataatinniarlugit paasisitsiniaasoqarlunilu tusarniaasoqassasoq ukiuni tulliuttuni marlunni.

Aningaasaqarneq

EU-mit isertittakkatta Blok tilskudenik allaanerussutigaat tapiissutaanngimmata kisiannili niueqatigiinnermik aallaaveqarlutik, taamaakkaluartoq isumaqarpugut EU-p pisassai uagut pissarsiatsinnut sanilliullugit anginerujussuusut. Taamaattumik aningaasat kaaviaartut uagut nammeneq aqtutsinnik annertusartuarnissaat pisariaqarpoq.

Aningaasaqarnermut siunnersuisooqatigiit oqariartuutigaat nunatta aningaasaqarnera patajaatsorujussuusoq tamanna tusarluarnarpoq sillimmartaartariaqarpugulli siunissaq qaninnerusoq eqqarsaatigalugu tassami qularnangilluinnartoq unaavoq, aappaagu

ikummatissaq annertuumik akitsussammat allaat marloriaatinngorsinnaalluni tamannalu annerusumik iliuuseqanngikkutta inuaqatigiinnut eqquerujussuarsinnaavoq.

Suliffeqarfutigut ukiorpassuarni kisremaassiffiusumik ingerlanneqartut suli annerusumik ineriertorsinnaanitsinnut killiliisuusinnaasarput unammilleqatigiinnissamilli ammaasoqartillugu inuaqatigiit alassattarnerat piffissami kingullermi takuarput. Oqallittariaqarpugut ineriertorneq taamaattoq siunissami ingerlatiinnassanerippuit, assersuutigiinnartigu RAL nunasiaataasimanitsinnik aallaaveqartumik ukiorpassuarni Dk kisiat aqqusaaqqaarlugu assartuinermik ingerlataqarpoq, soorunami qujanarpoq allannguineq ilorraap tungaanut saakkiartormat sulili toqqaannaq niueqateqarsinnaaneq eqartumik inissimavoq ass. akitsinnut niueqateqarsinnaaneq maannakkut imaaliallaannaq pisinnaanngilaq piumassuseqarpugulli aporfiusut piiassallugit.

Mittarfissuit

Mittarfissuit naammassinissaat aajunaralaannguanngorpoq, sulilu piareersimanata, taamaattumik aaliangiusimasariaqarparput aqussinnaasatsinnik nunatta ornigarneqarnissaa qulakkiissallugu. Nunami allamiunik tatineqariartorneq ersarissiartuinnartoq nunatsinni nunaqavissunik toqqissimaffigineqanngilaq, nunaqavissut salliunneqassappata ineriertornermilu siuttooqataallutik taava pisariaqarpoq ineriertortitsinissamut aningaasaliissutit amerlanerusut qulakkiissallugit tamanna qulakkeerneqarsinnaavoq pisortatigoortumik aningaasaliissuteqarnikkut imaluunniit bank atukkiisarnikkut periarfissiineratigut. Assersuutigilara Folketingimi ilaasortaallunga, Tyrkiamukarnikuuvugut paasiniarlugu sooq PNB-a taama sukkatigisumik nunami tassani qaffakkiartornersoq. Taamani paasisarput unaavoq, Tyrkiarmiut aaliangersimapput innuttaasunut allanullu aningaasanik atukkiisarneq ammanerulersinniarlugu tamannarpiaavorlu siuariartuploorsimanerannut tunngaviusoq, Siumumi isumaqarpugut ineriertortisiiniarluni atukkiisarneq ullumikkornit annerusumik iliuuseqarfigisariaqaripput.

Nunaqarfiiit isorliunerusullu

Nunarput isorartoorujuvuvoq, nioqqtissat nunaqarfinnut isorliunerusunullu ilaatigut tikittarput asioreerlutik taamaattumik nunatta iluani nammineq pilersorneq

annertusassallugu sanioqqunneqarsinnaanngilaq ass. kujataaniik naatsiat naatitallu annertusaaffigineqarsinnaapput aammali neqissaqarniarneq siuarsarlugu, eqqarsaatigeriartigummi puulukit neqerpassui ukiumummita qassi tonsi maanga tikisittarparput? Sooq uagut nammineq maani tunisassiarigutsigu? Immaqalu avannaani isorliunerusunilu containerinik naatitanik ineriertortitsinnaasunik pilersitsiortorluta.

Nunaqarfiiit isorliunerusullu periarfissaat annertusarneqartariaqarput, kultoorikkut, timersornikkut, ilinniartitaanikkut, inuussutissarsiuteqarnikkut allarpassuartigullu. Tamakkua ineriertortinneqassappata kommunit suleqatigineqarnissaat avaqqunneqarsinnaanngilaq.

Naalakkersuisut siulittaasuata oqalugiaammini eqqaavaa inuusuttut najugassaat politikkikkut sulissutigineqartut tamanna ajunngilluinnarpoq taamaattoq eqqaamaqqussavarput nunaqarfiiit isorliunerusullu inuusuttunik qimmarneqaannassangippata nunaqarfinni isorliunerusunilu inuusuttut najugassaannik ullumikkut naleqquettunik sanaartornissaq pingaartitanut ilaasariaqarluinnarmat.

Kultoori

Naalakkersuisut siulittaasuat ammaalluni oqalugiarami oqaatigaattaaq, kalaallit qimmiisa qimuttut ikiliartornerat kisianni qanoq iliuusissat ajoraluwartumik tikinnagit. Naluneqanngitsutut uani qinigaaffimmi siunnersuuteqarnikuuvunga nerukkaatissat akikillisaavigineqarnissaannut tunngasumik taamaattoq siunnersuut akuersaarneqarnikuunngilaq aammattaaq akit qaffakkiartorneranni nioqqutissanut akikillisaatissat tamakkiisumik ajoraluwartumik atorneqarnikuunngillat. Siunnersuut alla qaqinnikuusara tassaavoq kalaallit qimmii qimuttut illersorniarlugit iliuusissatut naalakkersuisut pilersaarusiussasut, siunnersuut taanna tunnavigalugu Taanna ukiaq manna naalakkersuisuniik iliuusissaq qaquinneqartussaavoq pissanganarporlu paasissallugu naalakkersuisut qanoq pilersaaruteqarnersut, soorlumi tamanna nukiginarsisoq.

Nunatta katersugaasiviata toqqorsiveqarnikkut aqqutissiuunneqarnissaa politikkikkut pingaarnersiuinermi inissinneqassasoq Naalakkersuisuttaaq pilersaarutiminni oqaatigaat kisianni taamaakkaluartoq aningaasaliissutinik suli takunngilagut. Tamakkua

Naalakkersuisunut eqqumaffigeqqullugit manna oqallinneq aqqtigalugu Siumumiik piumasarivarput.

Nunat allat

Nunat avannarliit aammalu Nunat avannarliit Killiit ukiuni arlalinni aalluppagut aningasaleeqatigiittarnitsinni iluaqutigisarlugit soorlu ilinniartitaanikkut, kultoorikkut, niuernikkut allarpassuartigullu. Aap oqartoqarsinnaavoq nunasiaataanerup kalunneri ullumikkut suli piusut nalilersortariaqarigut siunnersuisooqatigiiffiillu taamaattut ukiuni tulliuttuni ilaaffigiinnarnissaat pisariaqarnersoq, taamatummi Naalakkersuisut siulittaasuat aamma aperivoq. Nalilersuinissaq Siumumiik isumaqatigaarput nunattalu avammut mattukkaluttuinnarnissaat kissaatiginnginnatsigu oqaatigissavarput kisianni nammineerluni ilaasortaasinnaanera soqutiginartuusoq isumaqarpugut, nunattami ilaasortaaffii taamaattut iluaqutigisinnaappagit taava iluaqutigisariaqarpagut.

Ukiut qassissaa, akitsinnut ammanerulernissamik siunertaqarluta. Qaa kinguarsarunnaarluta soleqatigiinneq annerusoq aqqtissiuunniartigu, Canada Amerikalut periarfissanik ulikkaarput allaat Washington kisiat aallaaviginagu New York-imti atorfilittaqarnikkut annertusaasinjaavugut aningasarsiornerusinnaanerput siunertaralugu.

Nunani assigiinngitsuni aallartitagut pikkorissut ulappupput, kisianni aperisariaqarpugut ilumut pisariaqarnersoq EU-p iluani aallartitaqarfik marluk annertuut pigisariaqarnerigut? Ilumut Danmarkimi aallartitaqarfik taama annertutigisoq pisariaqarpa? Immaqa Danmarkimi aallartitaqarfik taama annertutigisariaqanngilaq nunanili allani aallartitaqarfeqarneq nukittorsaaffiginerusinnaavarput.

Siumumiik taamatut oqaaseqarluta Inatsisartut oqallilluarnissaannik kissaallugit, Naalakkersuisut siulittaasuata ammaalluni oqalugiaataanut taamatut oqaaseqarpugut.

Doris Jakobsen Jensen, Siumut